


荆川稗編

卷之五十六
卷之五十七


內閣文庫	漢書類	3009	60	366
函架	冊架	號	冊	函架

內閣文庫	漢書類	3009	60	366
函架	冊架	號	冊	函架



內閣文庫	
番號	漢 3009
冊數	60 (30)
函號	366 65





新刊唐荆川先生稗編卷之五十六

淺草文庫

後學吳興第一相校

諸家十四地理

敘河水所經及河南北諸水出入

桑欽水經後同

崑崙墟在西北去嵩高五萬里地之中也其高萬一
千里河水出其東北陬屈從其東南流入于渤海河
水又南入葱嶺山河水又西逕罽賓國北河水又西
逕月氏國南又西逕安息南河水與蜺羅跋禰水同
注蒼海又西逕四大塔北又西逕陀衛國北河水又
東逕皮山國北其一源出于閩國南山北流與葱嶺

河合東海蒲昌海河水又東與于闐河合南源導于
闐南山俗謂之仇摩置自置北流逕于闐國西治西
域上多玉石西去皮山三百八十里東去陽關五千
餘里釋法顯自烏帝西南行路中無人民沙行艱難
所逕之苦人理莫比在道一月五日得達于闐具國
殷庶民篤信多大乘學威儀齊整器鉢無聲南城一
十五里有刹寺中有石鞞石上有足跡彼俗言是
辟支佛跡法顯所不傳疑非佛跡也又西北流注于
河南河又東逕于闐北南河又東北逕并彌國北南
河又東逕在末國北北河又東北流分爲二水枝流

出焉北河自踈勒逕流南河之北北河又東逕莎車
國南比河之東南逕温宿國北河又東逕姑墨國南
河水又東逕注賓城南又東逕樓蘭城南而東注河
水又東注于洶澤又東入塞過敦煌酒泉掖郡南
河水又自東河曲逕西海郡南河水又東逕允川而
歷大榆小榆谷北又東過隴西河關縣北洮水從東
南來流注之河水又東北流入西卑郡界左合二川
南流入河又東北濟川水注之河水東又逕澆河故
城北河水又東北逕黃川城河水又東逕石城南左
合北谷水河水又東北逕黃河城南河水又東北逕

廣遠城北又合烏頭川水河水又東逕邯州城南河水又東臨津溪水注之河水又東逕臨津城北白土城南河水又東左會白土川水河水又東北會兩川右合二水河水又東得野亭南河水又東歷鳳林北河水又東與濰水合河水又逕左南城南大河又東逕赤岸北河水又東洮水注之又東過金城允吾縣北河水又東逕石城南又東過榆中縣北又東過天水北界又北過武威媼圍縣東北又東北過天水勇士縣北又東北過安定北界麥田山河水東北流逕安定祖厲縣故城西北河水又東北逕麥田城西又

北與麥田泉水合河水又東北逕麥田山西河水又東北逕于黑城北又東北高平川水注之河水又東北逕昫卷縣故城西河水又北過北地富平縣西河水又北逕富平縣故城西河水又北簿骨律鎮城河水又逕典農城東河水又北逕典農城東河水又東北逕廉縣故城東河水又與北枝津河水又東北逕渾懷鄆西河水又東北歷石崖山西又北過朔方臨戎縣西河水又北逕臨戎縣故城西河水又北有枝渠東出謂之銅口東逕沃野故城南漢武帝元狩三年立王莽之綏武也枝渠東注以溉田所謂智通在我矣河水又北屈而為南河出焉河

水又北迤西溢於窳渾縣故城東河水又屈而東流
 為北河東逕高關南河水自臨河縣東逕陽山南河
 水又南逕馬陰山西河水又東南逕朔方縣故城東
 北河水自朔方東轉逕渠搜縣故城北河水又東逕
 成宜縣故城南河水又東逕原亭城南河水又東逕
 宜梁縣之故城南河水又東逕副陽城南又東過臨
 沃縣南河水又東枝津出焉河水又東流石門水南
 注之河水又東逕固陽縣故城南河水又東逕塞泉
 城南而東注又東過雲中楨陵縣南又東過沙南縣
 北從縣東屈南過沙陵縣西河水屈而流白渠水注

之河水南入楨陵縣西北又南過赤城東又南過
 襄桐過縣西河水於二縣之間濟有君子之名河水
 又東南左合一水河水又南樹頽水注之河水又南
 太羅水注之河水又左得湍水口又南過西河固
 陽縣東河水又東端水入焉河水又南諸次之水入
 焉河水又南陽水注之又南離石縣西奢延水注之
 河水又南陵水注之河水又南得離石水口又南過
 中陽縣西中南縣故城在東東翼汾水隔越重山又
 南過土軍縣西河水又南合契水河水又南得大蛇
 水河水又右納辱水又南過上郡高奴縣東河水又

南蒲川石樓山南逕蒲城東河水又南過河東北屈
縣西河水又南得鯉魚河水又南羊求水入焉河又
南爲採桑津又南過皮氏縣西河水又南合蒲水河
水又南丹水西南河水又南黑水河水又南至嶧谷
傍河水又南洛水自獵山枝分東派東南注于河又
南出龍門口汾水從東來注之河水又南右合暢谷
水河水又南逕梁山原東河水又南嵒谷水注之河
水又南右合陶渠水河水又西徐水注之河水又南
逕子夏石室又南過汾陰縣西河水又逕郃陽城東
河水又南逕陶城西又南過蒲坂縣西河水南逕雷

首山西又南凍水注之又南至華陰潼關渭水從西
來注之河水歷船司空與渭水會河水又東北王澗
水注之河水又東逕閿鄉侯河東與全鳩澗水合又
東過河北縣南河水又東永樂澗水注之河水自河
北城南東逕芮城河水又會槃澗河水又東逕湖縣
故城北河水又東合栢谷水河水又東右合門水又
東過陝縣北又西逕陝縣故城南又東過大陽縣南
河水又東逕大陽縣故城南河水又東沙澗水注之
又東過砥柱澗河之右則嶠水注之河水又東于嶠
之水注焉又東過平陰縣北又東至鄧清水從西北

來注之河水又東與教水合河水又與畛水合河水
 又東合庸庸之水河水又東逕平陰縣北河水西會
 濳水一作右會河水又東過平陰縣北湛水從北來注之
 河水又東逕河陽縣故城南河水又逕臨平亭北河
 水又東逕洛陽縣北河水又東逕平縣故城北河水
 又東淇水入焉又東沛水注焉又東過鞏縣北洛水
 從縣西北流注之又東過成臯縣北濟水從北來注
 之河水又逕黃馬坂北河水又東逕旋門坂北河水
 東逕成臯大伾山下河水南對玉門河水又東合汜
 水河水又東逕板城北河水又東逕五龍塢北又東

過滎陽縣蕩蕩渠出焉河水又東北逕卷之扈亭北
 河水又東逕八激堤北河水又東逕卷縣北河水又
 東北逕赤岸固北而東北注之又東北過武德縣東
 沁水從之東至酸棗縣西濮水東出焉河水又東北
 通謂之延津河水又逕東燕縣故城北則有濟水自
 北來注之河水又東淇水入焉又東逕遮害亭南河
 水又右逕滑臺城又東北過黎陽縣南河水自津東
 北逕涼城縣河水又東北逕伍子胥廟南河水又東
 北為長壽津故瀆東北逕戚城西故瀆又逕繁陽縣
 故城東北逕陰安縣故城西故瀆又東北逕昌樂縣

故城東故瀆又東北逕平邑郭西又東北逕元城縣
故城西北而至沙丘堰至于大陸北播于九河河之
故瀆自沙丘堰南分屯氏河出焉河水故瀆東北逕
發于縣北城西又屈逕其北大河故瀆又東逕貝丘
縣故城南大河故瀆又東逕甘陵縣故城南大河故
瀆又東逕平原縣故城西而北絕屯氏三瀆北逕繹
幕縣故城東北西流平原高縣故城西大河故瀆又
北逕脩縣故城東又北逕安陵縣西大河故瀆北出
爲屯氏河逕館陶縣東東北出左瀆又北逕經城東
繹城西又逕南宮縣西北注絳瀆右瀆又東北逕廣

東宗縣故城南又東北逕界城亭北又東北逕長樂
郡武疆縣故城東又東北逕廣川縣與水故道合又
東北逕廣川縣故城西又東逕棘津亭南張甲故瀆
又東北至脩縣東會清河屯氏別河東枝津出焉東
逕信城城南又東逕青陽縣故城南清河郡北又東
北逕陵鄉南又東北逕東武城縣故城南又東北逕
東陽縣故城南屯氏別瀆又東北逕清河郡南又東
北逕清河故城西屯氏別河北瀆東逕繹幕縣故城
南東邑大河故瀆又東北逕平原縣枝津北出至南
陵縣遂絕屯氏別河北瀆又東北逕重平縣故城南

并州系錄 卷之五十六
屯氏別河北瀆又東入陽信縣今無水又東爲咸河
東北流逕陽信縣故城北屯氏別河南瀆自平原東
絕大河故瀆又逕平原縣故城北東北枝津又出東
北至安德縣界東會商河屯氏別河南瀆又東北於
平原界又有枝渠右出至安德縣遂絕屯氏別河南
瀆自平原城北首受大河故瀆東出亦通謂之篤馬
河東北逕安德縣故城西又東北逕臨濟城南始又
屈逕其城東故瀆廣四十步又東北逕重丘縣故城
西又東北逕西平昌縣故城北又逕般縣故城北東
逕樂陵縣故城北又東北逕陽信縣故城南東北入

海屯氏河故瀆自別河東逕其陵之信鄉縣故城南
屯氏故瀆又東逕其陵縣故城北逕靈縣北又東北
逕郟縣與鳴犢河故瀆合上承大河故瀆於靈縣南
東北逕靈縣東東入郟縣而北合屯氏瀆屯氏瀆兼
鳴犢之稱也又東逕郟縣城北東北合大河故瀆謂
之口十三州志曰鳴犢河東北至修入屯氏考瀆則
不至也又東北右過衛國縣南又東北過濮陽縣北
瓠子河出焉河水東逕鉞丘南河水東北流而逕濮
陽縣北爲濮陽津河水又東北逕衛國縣南東爲郭
口津河水又東逕城縣北一作國口河水又東北逕范縣

之秦亭西河水又東北逕委粟津左會浮水故瀆故瀆東絕大河故瀆東逕五麻之野浮水故瀆又東南逕國邑又東逕衛國縣故城南古斟觀浮水故瀆又東逕河牧城而東北出又東北入東武陽縣東入河又有漯水出焉河水又東逕武陽東范縣西而東北流也又東北過東阿縣北河水於范縣東北流爲倉亭津河水又歷柯澤逕東阿縣故城西而東北出流注又東北過茌丘縣西河自鄧里渠東北逕昌鄉亭北逕礪礪城西河水又與鄧里渠水上承大河於東河縣西東逕東阿縣故城北又東北逕縣邑與將渠

合又北逕茌平縣東臨邑縣故城西北流入於河河水又東北流四瀆津又東北過高唐縣界漯水又東北逕清河縣故城北漯水又東北逕文鄉城東南又東北博平縣又與黃溝同注川澤又東逕文鄉城又東南逕王城北黃溝又東北逕左與漯水隱覆勢鎮河陸東出於高唐縣大河又迤東注漯水矣漯水又東北逕援縣故城西漯水又逕高唐縣故城東漯水又北逕陰縣故城北漯水又東北逕著縣故城南又東北逕崔氏城北漯水東南逕東朝陽縣故城南漯水又東逕漢徵君伏生墓南漯水又東

北逕建信縣故城北潔水又東北逕千乘縣二城間
 又東北為馬常坑又東北過楊墟縣東商河出焉商
 河又北逕平原縣東又逕安德縣故城南又東北逕
 昌平縣故城南又東逕般縣故城南又東逕樂陵縣
 故城南商河又東逕初鄉縣故城南沙溝水注之商
 河又東北流逕馬嶺城西北而流屈而東注南轉逕
 城東商河又東北逕富城縣故城北商河又分為二
 水南水謂之長聚溝北水世又謂之白薄瀆大河又
 東北逕高唐縣故城西大河又北逕張公城臨側河
 湄河水又北逕平原縣故城東大河右溢世謂之甘

棗溝故瀆又東北歷長堤逕溫陰縣北河水又東北
 逕陽阿縣故城西又東北過潔陽縣北河水自平原
 左逕安德城東而北為廉角津東北逕般縣樂陵初
 鄉厭次縣故南厭次河河水又逕潔陰縣故城北一作
 又河水又東北為潔沃津河水又東逕千乘城北又
 東北過黎城縣北又東北過甲下邑濟水從西來注
 之又東北入于海河水又東分為二水枝津東逕甲
 下城南東南歷常沈注濟

汾水出太原汾縣陽北管涔山東南過晉陽縣東晉
 水從縣南東流注之又南洞過水從東來注之又南

過大陵縣東又南過平陶縣東文水從西來流注又
南過寇爵津一作冠又南入河東界又南過未安縣西
又南過楊縣東西南過高梁邑西又南過平陽縣東
又南過臨汾縣東又屈從縣南西流又西過長脩縣
南又西過皮氏縣南又西至汾陰縣北西注于河
澮水出河東絳縣東澮交東高山西過其縣南又西
南過虜祁宮南又西至王橋注于汾水
涑水出河東聞喜縣東山黍葭谷又西過周陽邑南
又西南過其縣南又西南過安邑縣西又南過解縣
東又西南注于張陽池

文水出大陵縣西山文谷東到其縣屈南到平陶縣
東北東入于汾

原公水出茲氏縣西羊頭山東過其縣北又東入于
汾

洞庭水出沾縣北山西過榆次縣南又西到晉陽縣
南西入于汾出晉水下口者也

晉水出晉縣西懸壅山又東過其縣南又東入于汾
水

湛水出河內軹縣西北山東過其縣北又東過波縣
之北又東過毋辟邑南又東南當平陰縣之東北南

入于河

濟水出河東垣縣東王屋山爲沅水又東至温縣西
北爲濟水又東過其縣北屈從縣東南流過墳城西
又南當鞏縣北南入于河與河合流又東過城臯縣
北又東過滎陽縣北又東至北礫磧南東出過滎陽
北濟水又東逕西廣武城北濟水又東逕東廣武城
北濟水又東逕敖山北濟水又東合滎濟濟水又東
逕滎陽北濟水又東南礫石溪水注之濟水又東索
水注之又東過陽武縣北濟水又東北流南濟也逕
陽武縣故城南濟水又東逕封丘縣南濟水又東逕

東昏縣故城北濟水又東逕濟陽縣故城南又東過
封丘縣北北濟也濟水又東逕原武縣故城南濟瀆
又東逕酸棗縣之烏巢澤北又東過平丘縣南北濟
也濟水者又東過濟陽縣北濟也又東過寃眚縣南
又東過定陶縣南南濟也濟水又東北荷水東出焉
濟水又東逕秦相魏冉冢濟水又東北逕定陶恭王
陵南濟水又東北逕定陶縣故城南又屈從縣東北
流南濟也濟水又東至乘氏縣西分爲二南爲河水
北爲濟瀆北濟又東北逕寃眚縣故城北又東北與
濮水濟水故瀆又北右合洪水之東北過壽張縣西

界安民亭南汶水從東北來注之濟水又北逕須朐城西濟水又逕微鄉東又北過須昌縣西濟水又北逕漁山東左合馬頰水濟水自魚山北逕清亭東又北過穀城縣西濟水又北逕周首亭西又北過臨邑縣東濟水又北逕平陰城西濟水又東北至垣苗城西又東北過盧縣北濟水又逕盧縣故城北濟水又東北與中川水合濟水又東北右會玉水濟水又東北灤水出焉濟水又東北華不注山又東北過臺縣北濟水又東北合芹溝水又東北過管縣南又東過梁鄰縣北又東北過臨濟縣南濟水又東北迤爲淵

渚謂之平州濟水又東北逕樂安縣故城南又東北過利縣西又東北過甲下邑入于河又東北入海其一水東流者過乘氏縣南又東過昌邑縣北又東過金鄉縣南又東過東緡縣北濟水又東逕漢平狄將軍扶浦侯淮揚朱鮪冢又東過方與縣為荷水濟水東逕重鄉城南荷水又東過湖陸縣南東入于泗水又東南過濟縣東北又東南過留縣北又東過彭城縣北睢水從西來注之濟水又南逕彭城縣故城東又東南過徐縣北又東至下邳睢陵縣南入于淮清水出河內修武縣之北黑山東北過獲嘉縣北又

東過汲縣北又東入于河

沁水出上黨涅縣謁戾山南過穀遠縣東又南過猗氏縣東又南過陽阿縣東又南出山過沁水縣北又東過野王縣北又東過周縣北又東過邢丘一曰懷遠之北又東過武德縣南又東南至滎陽縣北東入于河

洪水出河內隆慮縣西大號山又東過內黃縣南爲白溝屈從縣東北與洹水合又東北過館陶縣北又東北過清淵縣西又東北過廣宗縣東爲河清又東北過東武城縣西又北過廣川縣東又東過修縣南

又東北過東光縣西又東北過南皮縣西又東北過浮陽縣西又東北過濊邑北又東北過鄉邑南又東北逕窮河邑南又東北過漂榆邑入于海
蕩水出河內陰縣西山東又東北至內黃縣入于黃澤

洹水出上黨泫氏縣東過隆慮縣北又東北出山逕鄴縣南又東過內黃縣北東入于白溝

濁漳水出上黨長子縣西發鳩山之漳水焉東過其縣南屈從縣東北流注又東過壺關縣北又東北過屯留縣潞縣北又東過武安縣又東出山過鄴縣西

又東過列人縣南又東北過斥漳縣南又東北過曲周縣東又東北過鉅鹿縣東又北過堂陽縣西又東北過扶柳縣北又東北過信都縣西又東北過下博縣之西又東北過阜城縣北又東北至昌亭與雩池河會又東北至樂城陵縣別出北又東北過成平縣南合清河又東北過章武縣西又東北過平舒縣南東入海

清漳水出上黨沾縣西北少山大黽谷南過縣西又從縣南屈東過涉縣西屈從縣南東至武安縣南黍言邑入于濁漳

易水出涿郡故安縣閭鄉西山東過范陽縣南又東過容城縣南又東過安次縣南又東過泉州縣南東入于海

涿水出代郡靈丘縣高氏山南過廣昌縣南又東南過中山上曲湯縣北恒水從西來注之又東過唐縣南又東過安喜縣南又東過安國縣北又東過博陵縣定州博野南又東北入于易
聖水出上谷東過良鄉縣南又東過長鄉縣北又東過安次縣南東入于海

巨馬河出代郡廣昌縣涑山東過廼縣北又東南過

容城縣北又東南至泉州縣西南東入八丈溝又南
 又東過淳海東平舒縣北東入于海
 濕水出鴈門陰館縣東北過代郡桑乾縣南又東過
 涿鹿縣北又東南出山過廣陽薊縣北又東至漁陽
 雍奴縣西入哥溝
 濕餘水出上谷居庸關東又東流過軍都縣南又東
 流過薊縣北又北屈東南至孤奴縣西入于沽河
 沽河從塞外來南過漁陽孤奴縣北西南與濕餘水
 合為沽河又東南至雍奴縣西哥溝又東至南泉州
 縣與清河合東入于海清河者派河尾也

鮑丘水從塞外來南過漁陽縣東又南過潞縣西又
 南至雍奴縣北屈東入于海
 濡水從塞外來東南過遼西今支縣北又東南過海
 陽縣西南入于海
 大遼水出塞外衛白平山東南入塞過遼東襄平縣
 又東南過房縣西又東過安市縣西南入海又玄兔
 高句麗縣有遼山
 小遼水所出西南至遼遂縣入于大遼水也
 淇水出樂浪鏤方縣東南過于臨淇縣東入于海
 洛水出京兆上洛縣謹舉山洛水又東戶水注之洛

水又東得乳水水又東會于龍餘之水洛水又東門
 水出焉洛水又東逕熊耳山北東北過盧氏縣南洛
 水逕陽渠關北洛水又東逕盧氏縣故城南洛水東
 與高門水合洛水又東松陽溪水注之洛水又東庫
 谷水注之又東北過蠡城邑之南又東過陽市邑南
 又東北過于父邑之南洛水又東渠谷又東北宜陽
 縣南洛水又東逕宜陽縣故城南又東北出散關南
 洛水又東枝瀆左出焉又東北過河南縣南又東過
 洛陽縣南伊水從西來注之又東過偃師縣南洛水
 又北陽渠水注之洛水又東逕訾城北又東羅水注

之又東北過鞏縣東又北入于河洛水又東北流入
 于河

伊水出南陽西荀渠山東北過郭落山又東北過陸
 渾縣南又東北過新城縣南又東北過伊闕中又東
 北至洛陽南北入于洛

灑水出河南穀城縣北山東與千金渠合又東過洛
 陽縣南又東過偃師縣又東入于洛

澗水出新安縣南白石山東南入于洛
 穀水出弘農黽池縣南墻塚林穀陽谷東北過穀城
 縣北又東過河南縣北東南入于洛

甘水出弘農宜陽縣鹿蹄山東北至河南縣南北入于洛

漆水出扶風杜陽縣俞山東北入于渭

澹水出京兆藍田谷北入于灊

沮水出北地直路縣東過馮翊祜縣北東入于洛

渭水出隴西首陽縣渭谷亭南鳥鼠山又北過襄武

縣北又東過獮道縣南又東過冀縣北又東過上邽

縣又東過陳倉縣西又東逕武功縣又東芒水從南

來流注之渭水又東過槐里縣南又東澇水從來注

之渭水又東北逕黃山宮南就水注之渭水又東合

田溪水渭水又東逕槐里縣故地南渭水又東合甘

水又東豐水從南來注之渭水又東北與鎬水合渭

水又東北逕渭城南而沈水注之又東過長安縣北

渭水又東與沈水枝津合渭水又逕長安城北又東

過華陰縣北又東過鄭縣北又東過灊陵縣北霸水

從縣西北流注之東入于河

漾水出隴西氐道縣嶓冢山東至武都沮縣為漢水

又東南至廣魏白水縣西又東南至葭萌縣東北與

羗水合又東南過巴郡閬中縣又東南入漢州江津

縣東南入于江

丹水出京北上洛縣西北冢嶺山東南過其縣南又東南過商縣南又東南至丹水縣入于洧浙

汝水出河南梁縣勉鄉西天息山東南過其縣北又

東南穎川頰縣南又東南過定陵縣北又東南過鄆

縣北又東南過汝南上蔡縣西又東南過平輿縣一作

平輿又東至原鹿縣南入于淮

穎水出穎川陽城縣西北少室山又東南過其縣南

又東南過陽翟縣北又東南過穎陽縣西又東南過

穎陰縣西南又東南至慎縣東南入于淮又東南過

臨穎縣南又東南汝南潁強縣北洧水從河南密縣

東流注之又東過西華縣北又南過汝陽縣北又東

南過南頓縣北潁水從西來流注之又東南至新陽

縣北蕩蕩渠水從西北來注之

洧水出河南密縣西南馬領山又東南過長杜縣南

又東過鄭縣南鄆水從西北來注之又東南過長社

縣北又東南過新汭縣東北又東南過茅城邑之東

北又東過習陽城西折入于穎

潁水出河南密縣大騮山東南入于穎

潧水出鄭縣西北平地東過其縣北又東南過其縣

東又南入于洧水

渠水出滎陽北河東南過中牟縣之北又東至浚儀縣又屈南至扶溝縣北其一者東南過陳縣也又東南汝南新陽縣北又東南過山桑縣北又東南過龍亢縣南又東南過義城縣西南入于淮
 陰溝水出河南陽武縣浪蕩渠東南至沛為過水又東南至下邳淮陵縣入于淮
 汲水出陰溝于浚儀縣北又東至梁郡蒙縣為淮水餘波南入淮陽城中
 獲水出汲水於梁郡蒙縣北又東過蕭縣南又東至彭城縣北東入于泗

睢水出梁郡鄆縣又東過睢陽縣南又東過相縣南屈從城北東流當蕭縣南入于睢
 瓠子河出東郡濮陽縣北河東至濟陰句縣為新溝又東北過廩丘縣為濮水又北過東郡范縣東北為濟渠與將渠合又東北過東阿縣東又東北過臨邑縣西又東北過荏平縣東為鄧里渠又東北過祝阿縣為濟渠又東北至梁鄒縣西分為二其東北者為濟河其東者為時水又東北至濟西濟河東北入于海時水東至臨淄縣西屈南過太山華縣東又南至費縣東入于沂

汶水出太山萊蕪縣原山西南過羸縣南又東南過奉高縣北屈從縣西南流過博縣西北又西南過蛇丘縣南又西南過岡縣北定陶東北又西南過平章縣南又西南過無鹽縣南又西南過壽張縣北又西南至安民亭入于濟

泗水出魯卞縣北山西南逕魯縣北又西過瑕丘縣東屈從縣東南流瀛水從東來注之又南過平陽縣西又南過高平縣西洸水從北西來流注之又南過方與縣東

荷水從西來注之

縣南有洧水從

東北來流注之又南過沛縣東又東逕山陽郡又東南過彭城縣東北又東南過呂縣南又東南過下邳縣西又東南入于淮

沂水出泰山蓋縣艾山南過琅邪臨沂縣東又南過開陽縣東又東過襄賁縣東屈從縣南西流又屈南過剡縣西又南過長城縣西又南過下邳縣西南入于泗

洙水出泰山蓋縣臨樂山西南至卞縣入于泗
沐水出琅耶東莞縣西北山東南過其縣東又東南過莒縣東又南過陽都縣東入于沂

巨洋水出朱虛縣泰山北過其縣西又北過臨朐縣
東又北過劇縣西又東北過壽光縣西又東北入于
海

淄水出泰山萊蕪縣原山又東北過臨淄縣東又東
過利縣東又東北入于海

汝水出朱虛縣泰山北過其縣東又北過淳于縣西
又東北入于維

濰水出琅邪箕縣東北過東武城縣西又北過平昌
縣東又北過高密縣西又北過淳于縣東又東北逕
都昌縣東又東北入于海

膠水出黔陬縣膠山北過其縣西又北過夷安縣東
又北過當利縣西北入于海

沔水出武都沮縣東狼谷中沔水又東南逕沮水戍
而東南流注漢白沮口沔水又東逕白馬戍南澧水
入焉沔水又東逕武侯壘南又東逕沔陽故城南沔
水又東逕西樂城北漢水又左得度口水漢水又東
黃沙水左注之漢水又東合褒水漢水又東逕漢廟
堆下又東過南鄭縣南漢水又東得長柳度漢水又
左會文水漢水又東黑水注之又東過城固縣南又
東過魏興安陽縣南泔水出自旱山北涇之漢水又

東至瀼城南與駱谷水合漢水又東逕小城固南漢水又東逕石門灘漢水又東逕媯墟為難漢水又東逕猴徑灘漢水又東逕小大黃金南漢水又東合蘧蔭漢口漢水又東右會洋水漢水又東歷敖頭漢水又東合直水漢水又東逕直城南漢水又東逕晉昌郡之寧都縣南漢水又東逕魚脯溪口又東過西城縣南漢水又東右得大勢漢水又對月谷口漢水又東逕西城縣故城南漢水又東為鱣湍漢水又東合洵水漢水又東逕木蘭寨南漢水又東左得育漢漢水又東逕魏興郡之錫縣故城北漢水又東歷姚方

沔水又東過襄陽縣北沔水又東合檀溪水沔水又逕平魯城南又從縣東屈西南涓水從北來注之沔水中有魚梁洲沔水又逕桃林亭東沔水又東南逕蔡洲沔水又東南邑城北沔水又東合洞口又東過中虛縣東沔水又東南流逕黎丘故城西又南過邛一作縣東北沔水又南得木里水會又南過宜城縣東夷水出自房陵縣東流注之沔水又逕郡縣故城南沔水又東敖水注之沔水又東南與白水合沔水自荊城東南流逕當陽縣之章山東沔水又東右會權口沔水又東南與陽口合又東南逕江夏雲杜縣

東夏水從西來注之沔水又東逕左桑沔水又東合
區亮水口沔水又東得合驛口沔水又東謂之橫桑
沔水又東謂之鄭潭沔水又東得死沔沔水又東與
力口合沔水又東南澗水入焉沔水又東逕沌陽縣
北又南至江夏沙羨縣北南入于江沔水與江合流
又東過彭蠡澤又東北出居巢縣南又東過牛渚縣
南又東至石城縣分爲二其一東北流其一又過毗
陵縣北爲北江南江又東與貴長池水合南江又南
東逕宣城之臨城縣南南江又東與桐水合南江又
東逕寧國縣南南江又東北爲長瀆歷河口東則松

江出焉江水奇分謂之三江口又東至會稽餘姚縣
東入于海江水又東逕黃橋下江水又東逕餘姚縣
故城南江水又東注于海又東過堵陽縣堵水出焉
自上粉縣北流注之又東過鄞鄉縣南漢水又東逕
鄞陽縣故城南漢水又東逕毬琶谷口又東北流又
屈東南過武當縣東北漢水又東爲佷子潭漢水又
東南逕武當縣故城北漢水又東平陽川水注之沔
水又東南逕縣城東沔水又東逕龍巢山下又東南
逕涉都縣東北又東南過鄞縣之西南又南逕穀城
東又南過陰縣之西沔水又東南得洛溪口又南過

并州系
卷之五十一
三十四
筑陽東筑水出自房陵縣東過其縣南流注之又東
逕學城南沔水又南逕筑城縣東沔水又東爲漆灘
又東過山都縣東北沔水又東逕樂山北沔水又東
逕隆中

潛水出巴郡宕渠縣又南入于江

湍水出酈縣北芬山南流過其縣東又南過冠軍縣
東又東過白牛邑南又東南至新野縣東入于洧
均水出浙縣北山南流過其縣之東又南當涉都縣
邑北南入于沔

粉水出房陵縣東流過郢邑南又東過穀邑南東入

于沔

白水出朝陽縣西東流過其縣南又東至新野縣西
東入于洧

此水出泚陽東北太胡山東南流逕其縣南泄水從
南來注之又西至新野縣南入于洧

淮水西南陽平氏縣胎簪山東北過桐柏山淮水又
東逕義陽縣淮水又逕義陽縣故城南淮水又東得
澗口水東過江夏平春縣北淮水又東油水注之淮
水又東北與大木水合淮水又東北流左會湖水淮
水又東逕安陽縣故城南又東逕新息縣南淮水又

東逕浮光山北淮水又東右壑水淮水又東北申陂
枝水注之淮水又東逕淮陰亭北又東逕白城南淮
水又東逕長陵戍南又東青陂水注之淮水又東北
合黃水又東過期思縣北淮水又東北淠一作淠水注
之東過鹿縣南汝水從西北來注之又東過廬江安
豐縣東北決水從北來注之淮水又東谷水入焉淮
水又東北左會澗水淮水又東北窮水入焉又東北
至九江壽春縣西泚水洪水合北注之又東潁水從
西北來流注之淮水又東流與潁口會東南逕倉陵
北又東北流逕壽春縣故城西淮水又北左合椒水

又東過壽春縣北肥水從縣東北流注之淮水又北
逕山碇中謂之碇石淮水又北逕莫耶山西又東過
當塗縣北渦水從西北來注之淮水又東北濠水注
之淮水又北沙水注之又東過鍾離縣北淮水又東
逕夏丘縣南淮水又東逕浮山淮水又東逕徐縣南
歷澗水注之淮水又東池水注之淮水又東蘄水注
之淮水又東歷客山逕盱眙縣故城西又東北至下
邳淮陰縣西泗水從西北來流注之又東過淮陰縣
北中瀆水出白馬湖東北注之又東兩小水流注之
又東至廣陵淮浦縣入于海

汝水出南陽魯陽縣西之堯山東北過潁川定陵縣西北又東過鄆縣南東入汝

涓水出弘農盧氏縣攻離山東南過南陽西鄂縣西北又東過宛縣南又屈南過滎陽縣東又南過新野

縣西西過鄧縣東南入于沔

潁水出潁強縣南澤中東入潁

濯水出汝南吳房縣西北與山東過其縣北入于汝

瀨水出濳陰縣東上界山東過吳房縣南又東過濯

陽縣南又東過上蔡縣南東入汝

濩水出濩陰縣西北扶予山東過其縣南又東過西

平縣北又東過鄆縣南又東過定潁縣北東入于汝

澗水出蔡陽縣東南逕隋縣西又南過江夏安陸縣

西又東南入于夏

涿水出江夏平春縣西南過安陸入于澗

蘄水出江夏蘄春縣北山南過其縣西又南至蘄口

南入于江

浹水出廬江雩婁縣南大別山北過其縣東又北過

安豐縣東又北入于淮

泚水出廬江潛縣南西霍山東北東北過六縣東北

入于淮

泄水出博安縣北過芍陂西與泚水合西北入于淮
肥水出九江成德縣廣陽鄉西肥水別北過其縣西
北入芍陂又北過壽春縣東北入于淮

施水亦從廣陽鄉東南入于湖

沮水出漢中房陵縣淮水東南過臨沮縣界又東南

過枝江縣東南入于江

漳水出臨沮縣東荆山東南過蓼亭又東過章鄉南

又南至枝江縣北烏扶邑入于沮

夏水出江流于江陵縣東南又東過華容縣南又東

至江夏雲杜縣入于沔

羗水出羗叅糧又東南至廣魏白水縣與漢水合又

東南過巴郡閬中縣又南至墊江縣東南入于江

涪水出廣魏涪縣西北南至小廣魏與梓潼合

梓潼水出其縣北界西南入于涪又西南至小廣魏

縣南入于墊江

涪水出漢中南縣東南旱山北至沔陽縣南入于沔

敘江水所經及江以南諸水出入

岷山在蜀郡氏道縣大江所出東南過其縣北

江水自天彭關東逕汶關而歷氏道縣北又有湔水

出焉江水又東別為沱江水又歷都安縣又東南過

捷為武陽縣青衣水洙水從西南來合而注之又東
 南過樊道縣北若水淹水合從西來注之又東注水
 北流注江水又與符里水合又東過江陽縣南洛水
 從三危山東過廣魏洛陽南東南注之江水逕漢安
 縣北江水東逕樊石灘又逕大附灘又東過符縣北
 邪東南餽部水從符關東北注之又東北至巴郡江
 州縣東強水涪水漢水白水宕渠水水合南流注之
 又江水東至枳縣西延江從牂牁郡北流西屈注之
 又逕東望峽東歷平都江水又逕虎鬚灘江水又東
 逕臨江縣南江水又東得黃華水口左逕石城南又

東至平洲又東逕壤塗而歷和灘又東逕界壇江水
 又東右得將龜溪口江水又東南會北集渠江水又
 右逕池溪口江水又東逕右龍又東逕羊腸虎臂灘
 江水又東彭水注之江水又東右逕胸忍縣故城南
 江水又東逕瞿巫灘江水又逕東陽灘江水又逕魚
 復縣之故陵江水又東為落牛灘逕故陵北江水又
 右逕夜清而東歷朝陽道口江水又東左逕新市里
 南江水又東右合陽元水口江水又東逕南鄉峽東
 逕永安宮南江水又東逕諸葛亮圖壘南江水又
 東南逕赤岬西江水又東逕魚復縣故城南江水又

東逕廣溪峽西過鄧縣東江水自關東逕弱關捍關南入于沔江水自關東逕弱關捍關江水入東烏飛水注之江水又東逕縣故城南江水又東巫溪水從北注之江水又東逕巫峽江水歷峽東逕新崩灘江水又東逕石門灘又東過秭歸縣之南江水又東逕城北江水又東南逕夔城南江水又東逕歸鄉縣故城北江水又東逕信陵縣南江水又東過夷陵縣南江水歷峽東逕宜昌縣之壩窰下江水又東流頭灘江水又東逕宜昌縣北江水又東逕狼尾灘而歷人灘江水又東逕黃牛山江水又東逕西陵峽江水歷

禹斷江江水出峽東南流逕城故州江水又東逕故城北江水又東逕白鹿巖江水又東歷荆門虎牙之門又東南過夷道縣北夷水從狼山縣南東北注之江水又東逕上明城北江水又東會沮口又南過江陵縣南江水又東逕燕尾洲江水又東得馬牧口江水又東逕江陵縣故城南江水又東逕郢城南江水又東得豫章口江水又東至華容縣西夏水出焉又東南當華容縣南湧水出焉江水又東湧水注之江水又逕南平郡屬陵縣之樂鄉城北又東南油水從西南來注之又東右合油口又東逕公安縣北江水

左會高口江水又東得故市口江水又右逕楊岐北
山大江又東左合子夏口大江又東左得侯臺水口
大江又得龍穴水口江水自龍巢而東俞口又東得
清揚土塢二口大江又右逕石首山北又東逕赭要
江水左得飯筐上口江水又右得上檀浦江水又東
逕竹畦南又東至長沙下雋縣北澧水沅水資水合
東流注之湘水從東來注之江水又東左得二夏浦
又東逕彭城口江水自彭城巖東逕如山北江水又
左逕白螺山南江水左逕止烏林南江水又東左得
子練口江水左得中陽水口又東得白沙口江水東

右得聶口江水左逕百人山南江水東逕大軍山南
江水又東逕小軍山南江水又東逕雞翅山北又東
北至江夏沙羨縣西北沔水從北來注之江水又東
逕歎父山南對歎州江水又東逕魯山南江水左得
湖口水通太湖又東合澗口水承沔水於安陸縣
而東逕澠陽縣北東南注于江江水又東湖水自北
南注謂之加吳江右岸頻得二夏浦北對東城州西
浦側有雍伏戍江之左岸東會龍驤水口出北山蠻
中江之有武口水上通安陸之延頭江水東逕若城
南又東過邾縣南江水右得黎巖北江水又東逕邾

縣故城南鄂縣北江水右得樊口江水又左逕赤鼻山南又東逕西陽郡南郡治即西陽縣也江之右岸有鄂縣故城江水左則巴水注之江水又東逕較縣故城南東會希水口出瀟縣霍山西麓山北有瀟縣故城大江右岸有厭里口安樂浦江水左得赤水浦江水又東逕南陽山南江水又東逕西陵縣故城南江水東歷孟家澆江之右岸有黃石山水逕其北又東過蕪春縣南蕪水從北東注之又東過下雉縣北刊水從東陵西南注之又東左得青林口青衣水出青衣縣西蒙山東與沫水合也至犍爲南

安縣入于江

桓水出蜀部岷山西南行羗中入于南海若水出蜀郡旄牛徼外東南至故關爲若水也南過越嶲邛都縣西直南至會無縣淹水東南流注之又東北至犍爲宋提縣西瀘江水又東北至樊道縣入于江沫水出廣柔徼外東南過旄牛縣北又東至越嶲靈道縣出濛山縣東北與青衣水合東入于江延江水出犍爲南廣縣又東至犍犮縣東屈北流至巴郡涪陵縣注更始水又東南至武陵西陽縣入

于酉水酉水東南至沅陸縣入于沅
存水出犍爲郁鄔縣東南至鬱林定周縣爲周水又
東北至潭中縣注于潭

溫水出牂牁夜郎縣又東至鬱林廣鬱縣爲鬱水又
東至領方縣東與斤南水合東北入于鬱
淹水出越雋遂久縣徼外東南至蜻蛉縣又東過姑
復縣南東入于若水

益州葉榆河出其縣北界屈從縣東北流過不帶縣
東南出益州界入牂牁郡西隨縣北爲西隨水又東
出進桑關過交趾麓泠縣北分爲五水絡交趾郡中

至東界復合爲三水東入海

夷水出巴郡魚復縣江東南過狼山縣南又東過夷
道縣北東入于江

油水出武陵孱陵縣西界又東北入于江

澧水出武陵沅縣西歷山東過其縣南又東過零陽
縣之北又東過作唐縣北又東至長沙下雋縣西北
東入于江

沅水出牂牁且蘭陵爲旁溝水又東至鐔城縣爲沅
水又東北過臨沅縣南又東至長沙下雋縣西北入
于江

泚水出武陵鍾城縣北界沅水谷南至鬱林潭中縣
與鄰水合又東至蒼梧陵縣為鬱溪又東至高要縣
為大水又東至南海番禺縣西分為二其一南入于
海其一又東過縣東南入于海員水又東南一千五
百里入南海

資水出零陵都梁縣路山東北過夫夷縣東北過邵
陵縣之北又東北過益陽縣北又東與沅水合於湖
中東北入于江也

漣水出連道縣西資水之別又東北過湘南縣南又
東北至臨湘縣西南東入于湘

湘水出零陵始安縣陽海山東北過零陵縣東又東
北過洮陽縣東又東北泉陵縣西又東北過重安縣
東又東北過鄱縣西泰水從東南來注之又東北過
陰山縣西沘水從東南來注之又北過澧陵縣西瀝
水從東注之又北過臨湘縣西溜水從縣西北流注
又北瀉水從西南來注之又北過羅縣西澗水從東
來流注之又北過巴陵縣下雋西微水從東來流注
之又北至巴丘山入于江
澱水亦出陽海山南過蒼梧荔浦縣又南至廣信縣
入于鬱水

漆水出桂陽臨武縣南繞城西北屈東流東至曲江縣安甯邑東屈西南流過滇陽縣出淮浦關與桂水合南入于海

匯水出桂陽縣盧聚東南過含匯縣南出匯浦關爲桂水

深水出桂陽盧聚西北過零陵營道縣南又西北過營浦縣南又西北過泉陵縣西北七里至燕室邪入于湘

鍾水出桂陽南平縣都山北過其縣東又東北過宋渚亭又北過鍾亭與雞水合又北過魏寧縣之東又

東北入于湘

耒水出桂陽郴縣南山又北過其縣之西又北過便縣之西又西北過耒陽縣之東又北過鄴縣東北入于湘

洙水出茶陵縣上鄉西北過其縣西又西北過攸縣南又西北過陰山縣南又西北入于湘

澧水出醴陵縣東澧山西過其縣南屈從縣西西北流至澧浦注入于湘

瀏水出臨湘縣東南劉陽縣西北過其縣東北與澆溪水合西入于湘

潁水出豫章艾縣西過長沙羅縣之西又西累石山入于湘水

贛水出豫章南野縣西北過贛縣又西北過廬陵縣西又東北石陽縣西又東北過漢平縣南又東北過新淦縣西又北過南昌縣西又北過彭澤縣西北入于江

廬江水出三天子都北過彭澤縣西北入于江

漸江水出三天子都北過餘杭東入于海

斤江水出交阯龍編縣東北至鬱林領方縣東注二容容夜緬湛乘牛渚須無無濡營進皇無地零侵黎

無會重瀨夫省無變由蒲王都融勇外此皆出入南郡西東東入于海容容水在南塗名之以次轉北也右三十水從江已南至日南郡也

敘禹貢山水澤地所在

泰山為東嶽在泰山博縣西北霍山為南嶽在廬江灄縣西南華山為西嶽在弘農華陰縣西南雷首山在河東蒲坂縣東南砥柱在河東大陽縣東河中王屋山在河東垣曲縣東北也太行山在河內野王縣西北恒山為北嶽在中山上曲陽縣西北碣石山在遼西臨渝縣南水中也析城山在河東濩澤縣西南

并州和經 卷之五十五
三十一
太嶽山在河東永安縣壺中山在河東北屈縣東南
龍門山在河東皮氏縣西梁山在馮翊夏陽縣西北
河上荆山在馮翊懷德縣南岐山在扶風美陽縣西
北關山在扶風汧縣之西也隴山終南山敦物山在
扶風武功縣西南也須山在隴西臨洮縣西南嶓冢
山在隴西氐道縣之南鳥鼠同穴山在隴西首陽縣
西南積石在隴西河關縣西南都野澤在武威縣東
北合離山在酒泉會水縣東北流沙地在張掖居延
縣東北三危山在燉煌縣南朱圉山在天水北冀縣
南岷山在蜀郡湔氐道西嶓冢山在弘農盧氏縣南

荆山在南郡臨沮縣東北內方山在江夏竟陵縣東
北大別山在廬江安豐縣西南外方山崧高是也桐
柏山在南陽平氏縣東南陪尾山在江夏安陸縣東
北衡山在長沙湘南縣南九江地在長沙下雋縣西
北雲夢澤在南郡華容縣之東東陵地在廬江金蘭
縣西北敷淺原地在豫章歷陵縣西南彭蠡澤在豫
章彭澤縣北中江在丹陽蕪湖南東至會稽陽羨縣
入于海震澤在吳縣南五十里北江在昆陵北界東
入于江嶧陽山在下邳縣之西羽山在東海祝其縣
南也陶丘在濟陰定陶縣之西南荷澤在定陶縣東

雷澤在濟陰城陽縣西北荷水在山陽湖陸縣南蒙
山在太山蒙陰縣西南大野澤在山陽鉅野縣東北
大邳地在河南城臯縣北明都澤在梁郡睢陽縣東
北益州沱水在蜀郡汶江縣西南其一在郫縣西南
皆還入江荊州沱水在南郡枝江縣三澁地之南在
邛縣之北右禹貢山水澤地所在凡六十

新刊唐荆川先生稗編卷之五十六終

新刊唐荆川先生稗編卷之五十七

門生吳興姚翼考校

諸家十五地理

前漢地理志

班固

凡民函五常之性而其剛柔緩急音聲不同繫水土
之風氣故謂之風好惡取舍動靜亡常隨君上之情
欲故謂之俗孔子曰移風易俗莫善於樂言聖王在
上統理人倫必移其本而易其末此混同天下一之
虐中和然後王化教成也漢承百王之末國土變改
人民遷徙成帝時劉向畧言其域分丞相張禹使屬

穎川朱贛條其風俗猶未宣究故輯而論之終其本末著于篇秦地於天官東井輿鬼之分壑也其界自弘農故關以西京兆扶風馮翊北地上郡西河安定天水隴西南有巴蜀廣漢犍爲武都西有金城武威張掖酒泉敦煌又西南有牂牁越雋益州皆宜屬焉秦之先曰柏益出自帝顓頊堯時助禹治水爲舜朕虞養育草木鳥獸賜姓羸氏歷夏殷爲諸侯至周有造父善馭習馬得華駟綠耳之乘幸于穆王封于趙城故更爲趙氏後有非子爲周孝王養馬汧渭之間孝王曰昔伯益知禽獸子孫不絕廼封爲附庸邑之

于秦今隴西秦亭秦谷是也至玄孫氏爲莊公破西戎有其地子襄公時幽王爲犬戎所敗平王東遷雒邑襄公將兵救周有功賜受邽鄠之地列爲諸侯後八世穆公稱伯以河爲竟十餘世孝公用商君制轅田開阡陌東雄諸侯子惠公初稱王得上郡西河孫昭王開巴蜀滅周取九鼎昭王曾孫政并六國稱皇帝負力怙威燔書院儒自任私智至于胡亥天下畔之故秦地於禹貢時跨雍梁二州詩風兼秦豳兩國昔后稷封釐公劉處豳大王徙邽文王作豐武王治鎬其民有先王遺風好稼穡務本業故豳詩言農

桑衣食之本甚備有鄠杜竹林南山檀栢號稱陸海
爲九州膏腴始皇之初鄭國穿渠引涇水溉田沃野
千里民以富饒漢興立都長安徙齊諸田楚昭屈景
及諸功臣家於長陵後世世徙吏二千石高訾富人
及豪傑并兼之家於諸陵蓋亦以疆幹弱支非獨爲
奉山園也是故五方雜厝風俗不純其世家則好禮
文富人則商賈爲利豪傑則游俠通姦瀕南山近夏
陽多阻險輕薄易爲盜賊常爲天下劇又郡國輻湊
浮食者多民去本就末列侯貴人車服僭上衆庶放
效羞不相及嫁娶尤崇侈靡送死過度天水隴西山

多林木民以板爲室屋及安定北地上郡西河皆迫
近戎狄修習戰備高上氣力以射獵爲先故秦詩曰
在其板屋又曰王于興師修我甲兵與子偕行及車
麟四載小戎之篇皆言車馬田狩之事漢興六郡良
家子選給羽林期門以材力爲官名將多出焉孔子
曰君子有勇而亡誼則爲亂小人有勇而亡誼則爲
盜故此數郡民俗質木不恥寇盜自武威以西本匈
奴昆邪王休屠王地武帝時攘之初置四郡以通西
域鬲絕南羗匈奴其民或以關東下貧或以報怨過
當或以許逆亡道家屬徙焉習俗頗殊地廣民稀水

草宜畜牧故涼州之畜爲天下饒保邊塞二千石治之咸以兵馬爲務酒禮之會上下通焉吏民相親是以其俗風雨時節穀糴常賤少盜賊有和氣之應賢於內郡此政寬厚吏不苛刻之所致也巴蜀廣漢本南夷秦并以爲郡土地肥美有江水沃野山林竹木蔬食果實之饒南賈滇僂西近邛苻馬旄牛民食稻魚亡凶年憂俗不愁苦而輕易淫泆柔弱褊阨景武簡文翁爲蜀守教民讀書法令未能篤信道德反以好文刺譏賢慕權執及司馬相如游宦京師諸侯以文辭顯於世鄉黨慕循其迹後有王褒嚴遵揚雄

之徒文章冠天下繇文翁倡其教相如爲之師故孔子曰有教无類武都地雜氐羗及犍爲牂牁越雋皆西南外夷武帝初開置民俗畧與巴蜀同而武都近天水俗頗似焉故秦地天下三分之一而人衆不過什三然量其富居什六秦函吳札觀樂爲之歌秦曰此之謂夏聲夫能夏則大夫之至也其周舊乎自井十度至柳三度謂之鶉首之次秦之分也魏地觜觶參之分野也其界自高陵以東盡河東河內南有陳留及汝南之召陵滎彊新汲西華長平潁川之舞陽鄆許僞陵河南之開封中牟陽武酸棗卷皆魏分也

河內本殷之舊都周既滅殷分其畿內爲三國詩風邶庸衛國是也邶呂封紂子武庚庸管叔尹之衛蔡叔尹之以監殷民謂之三監故書序曰武王崩三監畔周公誅之盡以其地封弟康叔號曰孟侯以夾輔周室遷邶庸之民于維邑故邶庸衛三國之詩相與同風邶詩曰在浚之下庸曰在浚之郊邶又曰亦流于淇河水洋洋庸曰送我淇上在彼中河衛曰瞻彼淇澳河水洋洋故吳公子札聘魯觀周樂聞邶庸衛之歌曰美哉淵乎吾聞康叔之德如是是其衛風乎至十六世懿公亡道爲狄所滅齊桓公帥諸侯伐狄

而更封衛於河南曹楚丘是爲文公而河內殷虛更屬于晉康叔之風旣歇而紂之化猶存故俗剛彊多豪傑侵奪薄恩禮好生分河東土地平易有鹽鐵之饒本唐堯所居詩風唐魏之國也周武王子唐叔在母未生武王夢帝謂已曰余名而子曰虞將與之唐屬之參及生名之曰虞至成王滅唐而封叔虞唐有晉水及叔虞子燮爲晉侯云故參爲晉星其民有先王遺教君子深思小人儉陋故唐詩蟋蟀山樞葛生之篇曰今我不樂日月其邁宛其死矣他人是媮百歲之後歸于其居皆思奢儉之中念死生之慮吳札

聞唐之歌曰思深哉其有陶唐氏之遺民乎魏國亦
姬姓也在晉之南河曲故其詩曰彼汾一曲寘諸河
之側自唐叔十六世至獻公滅魏以封大夫畢萬滅
耿以封大夫趙夙及大夫韓武子食采於韓原晉於
是始大至於文公伯諸侯尊周室始有河內之土吳
札聞魏之歌曰美哉泂泂乎以德輔此則明主也文
公後十六世爲韓魏趙所滅三家皆自立爲諸侯是
爲三晉趙與秦同祖韓魏皆姬姓也自畢萬後十世
稱侯至孫稱王徙都大梁故魏亦號爲梁七世爲秦
所滅周地擲七星張之分野也今之河南雒陽穀成

平陰偃師鞏緱氏是其分也昔周公營雒邑以爲在
于土中諸侯蕃屏四方故立京師至幽王淫褒姒以
滅宗周子平王東居雒邑其後五伯更帥諸侯以尊
王室故周於三代最爲長久八百餘年至於赧王乃
爲秦所兼初雒邑與宗周通封畿東西長而南北短
短長相覆爲千里至襄王以河內賜晉文公又爲諸
侯所侵故其分地小周人之失巧僞趨利貴財賤義
高富下貧憲爲商賈不好仕宦自柳三度至張十二
度謂之鶉火之次周之分也韓地角亢氏之分野也
韓分晉得南陽郡及潁川之父城定陵襄城潁陽潁

并川系
陰長社陽翟邲東接汝南西接弘農得新安宜陽皆
韓分也及詩風陳鄭之國與韓同星分焉鄭國今河
南之新鄭本高辛氏火正祝融之虛也及成臯滎陽
潁川之崇高陽城皆鄭分也本周宣王弟友為周司
徒食采於宗周畿內是為鄭鄭桓公問於史伯曰王
室多故何所可以逃死史伯曰四方之國非王母弟
甥舅則夷狄不可入也其濟洛河潁之間乎子男之
國號鄆為大恃勢與險崇侈貪冒君若寄帑與賄周
亂而敝必將背君君以成周之衆奉辭伐罪亡不克
矣公曰南方不可乎對曰夫楚重黎之後也黎為高

辛氏火正昭顯天地以生柔嘉之材姜嬴荊芋實與
諸姬代相干也姜伯夷之後也嬴伯益之後也伯夷
能禮於神以佐堯伯益能儀百物以佐舜其後皆不
失祠而未有興者周衰將起不可偏也桓公從其言
乃東寄帑與賄號會受之後三年幽王敗桓公死其
子武公與平王東遷卒定號會之地右維左涉食溱
洧焉土陘而險山居谷汲男女亟聚會故其俗淫鄭
詩曰出其東門有女如雲又曰溱與洧方灌灌兮士
與女方秉管兮恂盱且樂惟士與女伊其相謔此其
風也吳札聞鄭之歌曰美哉其細已甚民弗堪也是

其先亡乎自武公後二十三世為韓所滅陳國今淮陽之地陳本太昊之虛周武王封舜後媯滿於陳是為胡公妻以元女太姬婦人尊貴好祭祀用史巫故其俗巫鬼陳詩曰坎其擊鼓宛丘之下亡冬亡夏值其鷺羽文曰東門之扮宛丘之栩子仲之子婆娑其下此其風也吳札陳闞之歌曰國亡王其能久乎自胡公後二十三世為楚所滅陳雖屬楚於天文自若其故潁川南陽本夏禹之國夏人上忠其敝鄙村韓自武子後七世稱侯六世稱王五世而為秦所滅秦既滅韓徙天下不軌之民於南陽故其俗夸奢上氣

力好商賈漁獵藏匿難制御也宛西通武關東受江淮一都會也宣帝時鄭弘召信臣為南陽太守治皆見紀信臣勸民農桑去末歸本郡以殷富潁川韓都士有申子韓非刻害餘烈高士宦好文法民以貪遴爭訟生分為失韓延壽為太守先之以敬讓黃霸繼之教化大行獄或八年亡重罪因南陽好商賈召父富以本業潁川好爭訟分異黃韓化以篤厚君子之德風也小人之德草也信矣自東井六度至亢六度謂之壽星之次鄭之分野與韓同分趙地昴畢之分壑趙分晉得趙國北有信都真定常山中山又得

并州系
涿郡之高陽鄭州鄉東有廣平鉅鹿清河河間又得
渤海郡之東平舒中邑文安東州成平章武河以北
也南至浮水繁陽內黃斥丘西有太原定襄雲中五
原上黨本韓之別郡也遠韓近趙後卒降趙皆趙分
也自趙夙後九世稱侯四世敬侯徙都邯鄲至曾孫
武靈王稱王五世為秦所滅趙中山地薄人眾猶有
沙丘紂淫亂餘民丈夫相聚游戲悲歌伉慨起則推
剽掘冢作姦巧多弄物為倡優女子彈絃踔躑游媚
富貴徧諸侯之後宮邯鄲北通燕涿南有鄭衛潼河
之間一都會也其土廣俗雜大率精急高氣勢輕為

姦太原上黨又多晉公族子孫以詐力相傾矜夸功
名報仇過直嫁娶送死奢靡漢興號為難治常擇嚴
猛之將或任殺伐為威父兄被誅子弟怨憤至告訐
刺史二千石或報殺其親屬鍾代石北迫近胡寇民
俗悞忤好氣為姦不事農商自全晉時已患其剽悍
而武靈王又益厲之故冀州之部盜賊常為他州劇
定襄雲中五原本戎狄地頗有趙齊衛楚之徙其民
鄙朴少禮文好射獵鴈門亦同俗于天文別屬燕燕
地尾箕分壑也武王定殷封召公於燕其後三十六
世與六國俱稱王東有漁陽右北平遼西遼東西有

井川系
上谷代郡鴈門南得涿郡之易容城范陽北新城故
安涿縣良鄉新昌及渤海之安次皆燕分也樂浪玄
菟亦宜屬焉燕稱王七世秦欲滅六國燕王太子丹
遣勇士荆軻西刺秦王不成而誅秦遂舉兵滅燕薊
南通齊趙勃碣之間一都會也初太子丹賓養勇士
不愛後宮美女民化以爲俗至今猶然賓客相遇以
婦侍宿嫁取之夕男女無別反以爲榮後稍頗止然
終未改其俗愚悍少慮輕薄無威亦有所長敢於急
人燕丹遺風也上谷至遼東地廣民稀數被胡寇俗
與趙代相類有漁鹽棗栗之饒北隙烏丸夫餘東賈

真番之利玄菟樂浪武帝時置皆朝鮮濊貉句驪蠻
夷殷道衰箕子去之朝鮮教其民以禮義田蚕織作
樂浪朝鮮民犯禁八條相殺以當時償殺相傷以穀
償相盜者男没入爲其家奴以子爲婢欲自贖者人
五十萬雖免爲民俗猶羞之嫁取無所讐是以其民
終不相盜無門戶之閉婦人貞信不淫辟其田民飲
食以籩豆都邑頗放效吏及內郡賈人往往以杯器
食郡初取吏於遼東吏見民無閉藏及賈人往者夜
則爲盜俗稍益薄今於犯禁寢多至六十餘條可貴
哉人賢之化也然東夷天性柔順異於三方之外故

孔子悼道不行設浮於海欲居九夷有以也夫樂浪
海中有倭人分爲百餘國以歲時來獻見云自危四
度至斗六度謂之析木之次燕之分也齊地虛危之
分野也東有菑川東萊琅邪高密膠東南有泰山城
陽北有千乘清河以南勃海之高樂高城重合陽信
西有濟南平原皆齊分也少昊之世有爽鳩氏虞夏
時有季山則湯時有逢公栢陵殷末有薄姑氏皆爲
諸侯國此地至周成王時薄姑氏與四國共作亂成
王滅之以封師尚父是爲太公詩風齊國是也臨淄
名營丘故齊詩曰子之營兮遭我虐穢之間兮又曰

矣我於著乎而此亦其舒緩之體也吳札聞齊之歌
曰泱泱乎大風也哉其太公乎國未可量也古有分
土亡分民太公以齊地負海島鹵少五穀而人民寡
廼勸以女工之業通漁鹽之利而人物輻湊後十五
世桓公用管仲設輕重以富國合諸侯成伯功身在
陪臣而取三歸故其俗彌侈織作冰紈綺繡純麗之
物號爲冠帶衣履天下初太公治齊修道術尊賢智
賞有功故至今其土多好經術矜功名舒緩闊達而
足智其失夸奢朋黨言與行謬虛詐不情急之則離
散緩之則放縱使桓公允襄公湣亂姑姊妹不嫁於

荆川集 卷之五十一
是今國中民家長女不得嫁名曰巫兒爲家主祠嫁者不利其家民至今以爲俗痛乎道民之道可不慎哉昔太公始封周公問何以治齊太公曰舉賢而上功周公曰後世必有篡殺之臣其後二十九世爲彊臣田和所滅而和自立爲齊侯初和之先陳公子完有罪來奔齊齊桓公以爲太夫更稱田氏九世至和而篡齊至孫威王稱王五世爲秦所滅臨淄海岱之間一都會也其中具五民云魯地奎婁之分壑也東至東海南有泗水至淮得臨淮之下相睢陵僅取慮皆魯分也周興以少昊之虛曲阜封周公子伯禽爲

魯侯以爲周公主其民有聖人之教化故孔子曰齊一變至于魯魯一變至於道言近正也瀕洙泗之水其民涉度幼者扶老而代其任俗旣益薄長老不自安與幼少相讓故曰魯道衰洙泗之間斷斷如也孔子閔王道將廢廼修六經以述唐虞三代之道弟子受業而通者七十有七人是以其民好樂上禮義重廉恥周公始封太公問何以治魯周公曰尊尊而親親太公曰後世寢弱矣故魯自文公以後祿去公室政在大夫季氏逐昭公陵夷微弱三十四世而爲楚所滅然本大國故自爲分壑今去聖久遠周公遺化

銷微孔氏庠序衰壞地陘民衆頗有桑麻之業亡林澤之饒俗儉嗇愛財趨商賈好訾毀多巧偽喪祭之禮文備實寡然其好學猶愈於他俗漢興以來魯東海多至卿相東平須昌壽良皆在濟東屬魯非宋地也當考宋地房心之分野也今之沛梁楚山陽濟陰東平及東郡之須昌壽良皆宋分也周封微子於宋今之睢陽是也本陶唐氏火正閼伯之虛也濟陰定陶詩風曹國也武王封弟叔振鐸於曹其後稍大得山陽陳留二十餘世爲宋所滅昔堯作游成陽舜漁雷澤湯止于亳故其民猶有先王遺風重厚多君子

其稼穡惡衣食以致畜藏宋自微子二十餘世至景公滅曹滅曹後五世亦爲齊楚魏所滅參分其地魏得其梁陳留齊得其濟陰東平楚得其沛故今之楚彭城本宋也春秋經曰圍宋彭城宋雖滅本大國故自爲分野沛楚之失急疾顓臾地薄民貧而山陽好爲姦盜衛地營室東壁之分壑也今之東郡及魏郡黎陽河內之野王朝歌皆衛分也衛本國旣爲狄所滅文公徙楚丘三十餘年子成公徙於帝丘故春秋經曰衛舉于帝丘今之濮陽是也本顓頊之墟故謂之帝丘夏后之世昆吾氏居之成公後十餘世爲韓

魏所侵盡亡其旁邑獨有濮陽後秦滅濮陽置東郡徙之於野王始皇既并天下猶獨置衛君二世時乃廢為庶人凡四十世九百年最後絕故獨為分野衛地有桑間濮上之阻男女亦亟聚會聲色生焉故俗稱鄭衛之音周末有子路夏育民人慕之故其俗剛武上氣力漢興二千石治者亦以殺戮為威宣帝時韓延壽為東郡太守承聖恩崇禮義尊諫爭至今東郡號善為吏延壽之化也其失頗奢靡嫁娶送死過度而野王好氣任俠有濮上風楚地翼軫之分壆也今之南郡江夏零陵桂陽武陵長沙及漢中汝南郡

盡楚分也周成王時封文武先師鬻熊之曾孫熊繹於荆蠻為楚子居丹陽後十餘世至熊達是為武王寢以疆大後五世至嚴王總帥諸侯觀兵周室并吞江漢之間內滅陳魯之國後十餘世頃襄王東徙于陳楚有江漢川澤山林之饒江南地廣或火耕水耨民食魚稻以漁獵山伐為業果蔬羸蛤食物常足故監窳媮生而亡積聚飲食還給不憂凍饑亦亡千金之家信巫鬼重淫祀而漢中淫失枝柱與巴蜀同俗汝南之別皆急疾有氣勢江陵故郢都西通巫巴東有雲夢之饒亦一都會也吳地斗分壆也今之會稽

九江丹陽豫章廬江廣陵六安臨淮郡盡吳分也殷
道既衰周大王亶父興邾梁之地長子太伯次曰仲
雍少曰公季公季有聖子昌太王欲傳國焉太伯仲
雍辭行采藥遂奔荆蠻公季嗣位至昌為西伯受命
而王故孔子美而稱曰太伯可謂至德也已矣三以
天下讓民無得而稱焉謂虞仲夷逸隱居放言身中
清廢中權太伯初奔荆蠻荆蠻歸之號曰句吳太伯
卒仲雍立至曾孫周章而武王克殷因而封之又封
周章弟中於河北是為北吳後世謂之虞十二世為
晉所滅後二世而荆蠻之吳子壽夢盛大稱王其少

子則季札有賢材兄弟欲傳國札讓而不受自太伯
壽夢稱王六世闔廬舉伍子胥孫武為將戰勝攻取
興伯名於諸侯至于夫差誅子胥用宰嚭為粵王句
踐所滅吳粵之君皆好勇故其民至今好用劔輕死
易發踐既滅吳後六世為楚所滅後秦又擊楚徙壽
春至子為秦所滅壽春合肥受南北潮皮革鮑木人
之輸亦一都會也始楚賢臣屈原被讒放流作離騷
賦以自傷悼後有宋玉唐勒之屬慕而述之皆以顯
名漢興高祖王兄子漢於吳招致天下之娛游子弟
枚乘鄒陽嚴夫子之徒興於文景之際而淮南王安

亦都壽春招賓客著書而吳有嚴助朱買臣賢顯漢
朝文辭並發故世傳楚辭其失巧而少信初淮南王
異國中民家有女者以待游士而妻之故至今多女
而少男本吳粵與楚接比數相并兼故民俗畧同吳
東有海鹽章山之銅三江五湖之利亦江東之一都
會也豫章出黃金然董董物之所有取之不足以更
費江南卑隰丈夫多天會稽海外有東鯁人分爲二
十餘國以歲時來獻見云粵地牽牛發女之分楚也
今之蒼梧鬱林合浦交阯九真南海日南皆粵分也
其君禹後帝少康之庶子云封於會稽文身斷髮以

避蛟龍之害後二十世至句踐稱王與吳王闔廬戰
敗之槁李夫差立句踐乘勝復伐吳吳大破之棲會
稽臣服請平後用范蠡大夫種計遂伐滅吳兼并其
地度淮與齊晉諸侯會致貢於周周元王使使賜命
爲伯諸侯畢賀後五世爲楚所滅子孫分散君服于
楚後十世至閩君搖佐諸侯平秦漢興復立搖爲越
王是時秦海南尉趙佗亦自王傳國至武帝時盡滅
以爲郡云處近海多犀象瑇瑁珠璣銀銅果布之奏
中國往商賈者多取富焉番禺其一都會也自合浦
徐聞南入海得大州東西南北方千里武帝元封元

年畧以為儋耳珠厓郡民皆服布如單被穿中央為貫頭男子耕農稻禾種紵麻女子桑蚕織績亡馬與虎民有五畜山多麋麋兵則矛盾刀木弓弩竹矢或骨為鏃自初為郡縣吏卒中國人多侵陵之故卒數歲一反元帝時遂罷棄之自日南障塞徐聞合浦船行可五月有都元國又船行可四月有邑廬漫國又船行可二十餘日有誼離國步行可十餘日有夫甘都廬國自夫甘都廬國船行可二月餘有黃支國民俗畧與珠厓相類其州廣大戶口多多異物自武帝以來皆獻見有譯長屬黃門與應募者俱入海市明

珠璧流離奇石異物齎黃金雜繒而往所至國皆稟食為耦蠻夷賈船轉送致之亦利交易剽殺人又苦逢風波溺死不者數年來還大珠至圍二寸以下平帝元始中王莽輔政欲耀威德厚遺黃支王令遣使獻生犀牛自黃支船行可八月到皮宗船行可二月到日南象林界云黃支之南有已程不國漢之譯使自此還矣

周道畧摠叙

一統志

道周天下八極殊滄水陸畢會交合于衢地故北惟開封南惟應天為水陸之大都會應天東南浮馳至

于鎮江自鎮南浮貫常達蘇左沿松右泛湖南由嘉
 興以底于杭惟杭逆浙經嚴及于金華東陟于處西
 及衢趨于廣信及建寧至延平西馳邵汀東經福興
 泉極于漳惟杭渡浙紹寧台溫會于處應天西南浮
 馳並會于嶽厥馳太平過和廬趨黃渡武駐于嶽厥
 浮太平南及寧國徽廣德北及和廬西經池安慶九
 江歷黃州武昌會馳于嶽惟九江南浮南康東及饒
 廣信以通浙閩南經南昌東及撫州建昌西及瑞南
 經臨江西及袁南經吉安贛南安過梅嶺歷南雄韶
 于廣州厥東浮馳歷惠並抵于潮南經肇慶高及于

雷西趨于海由雷泛海極于瓊惟武昌西北逆由漢
 陽沔陽安陸以達于襄陽惟嶽西浮由荆達歸以及
 于夔南及施州州衛西經涪南及黔西經重慶北及順
 慶保寧馳于成都西經瀘南及永寧趨于烏撒會于
 曲靖西經叙州嘉定由眉至于成都惟嶽西南浮馳
 常德歷辰沅思並至于思南北馳及播直走貴州歷
 安順鎮寧永寧普安會于曲靖以抵雲南西北及武
 定東南及廣西廣南南及臨安江西南經楚雄北及
 姚安經趙州南及景東北及大理鶴慶麗江經蒙化
 極于金齒惟岳南浮長沙西及寶慶南至衡東及彬

南歷永全桂林惟桂林西北浮柳厥西北達于慶遠
厥西及于田州泗城惟桂林南經平樂梧州南寧太
平抵于思明開封東南浮馳抵淮浮由鳳陽以達于
淮馳自歸德以至于淮之宿自淮而北浮馳並抵于
燕浮于徐兗以達東昌暨德過澗由通抵燕厥馳徐
兗東及濟南過東昌至河澗以駐于燕自淮而南浮
馳並至于應天厥馳自鳳陽以至厥浮由揚以達惟
茲淮安乃為南北之交衢自淮東馳西及于清通濟
南直走萊登泛海亦抵于遼陽開封東北馳于衛彰
廣平順德經真保至于燕惟燕東馳永平北極大寧

又東極于遼東北極于開平又西北抵于軍府開封
西北至■暨懷慶歷澤潞沁東及遼西及于汾平陽
與蒲經太原東及平定州西及岢嵐經代西及朔經
大同抵于蔚開封又西北自河南至西安北及延安
經邠北及慶陽至夏經平涼西及鞏昌惟鞏昌西北
馳于臨洮河州衛西南馳于岷洮經蘭州莊浪西及
西寧經涼州至永昌山以極于甘肅惟西安西南經
鳳翔漢中歷保寧潼川西北及于龍州西南至于成
都西北經茂州以極于松藩西南及雅黎歷邛部建
昌至于會川東南馳于重慶以通川江

三都論

考索

自古帝王之作莫不更都三河之間而周秦以降繼宅兩京五季而下又都大梁何帝居之不常也然考其所以定都改卜之意則有由矣大抵長安便於守洛陽便於利大梁便於戰三京利害各有一偏故前王因其便利而都之也方其正朔雖一而利勢不專藩侯棋布山河瓜分列國有唇齒之依朝廷無指臂之順必也守戰並修軍民兩恤俾其進足以制諸侯之變退足以保固宗社捨長安莫利也故宗周西漢繼宅西土勢或然也嬴秦隋唐踵卜長安仍以為安

也逮夫車書混一禮教興行舉綱朝廷張目郡縣於是偃武修文輕徭薄賦俾斯民均受其賜思所以新一王之制侔盛古之隆唯禮樂教化是遑而不以兵革戰伐為事則捨洛陽莫便也故周成漢光定都成周誠得其宜也曹魏司馬晉踵卜洛邑仍以為安也光武而下唯元魏孝文僅留意於稽古禮文之事故遠拔乎成中宅洛邑粲然新一王之政遠侔盛古亦遷都改卜有以相之若乃版圖未一侵伐鼎來夷狄外訖邊隅僭竊必也德刑兼修戰守兩備宿重兵於京師彊幹弱枝以鎮服夷夏而指蹤英雄以赴其功

則捨大梁莫便也朱梁而下以迄于宋仍都大梁亦
 勢或然也然有其利必有其害膏腴惰農險阻逸德
 如禦侮于海隅而忽艱虞於京輦者長安之不利也
 故五侯九伯不能亂周而大戎實亂之山東戰國不
 能亡秦而趙高實亡之藩狄不能犯函谷而王莽實
 篡漢燕晉不能隳符秦而姚萇實扁堅以至輔民課
 而新莽燼溼師繞而德宗跳豈非長安忘警戒之道
 也歟德化有時替而君不常明紀綱有時紊而政不
 常舉敵受八面而險不數舍一方矯虔九重震動此
 則洛邑之不利也在董卓奮而東漢亡爾朱騁而北

朝亂偏師犯闕如履門闌以至典午失馭藩侯弄兵
 往來如織王城不啻傳舍豈非洛陽失守戰之備也
 歟宴安起於無虞弊蠹生於悠久故載戰載橐而甲
 械朽鈍以安以處而士卒瘳憊兵多難用將逸難使
 可以隆安疆之威而不足以禦一旦之變此則汴都
 之不利也故石晉之亡兵叛于外也宋朝靖康之變
 太平之久也然則長安便于守洛陽便于歸太梁便
 於戰又在人之所便利如何固未可恃其所便而遽
 即於安也雖然玉京之制各有輔車屏蔽之地又不
 可不察長安之制以陝西為畿輔而屏蔽實在隴右

宋朝失於西夏洛陽之制以關東為畿輔而屏蔽實在河東大梁之制以河南為畿輔而屏蔽實在河北故由古以來洛京之禍常起于并汾汴都之變常起於燕趙長安之難雖不常所自而河隴之寇尤為頻駭良由失其外屏也是以河湟未歸則長安未易都雲朔未賓則洛陽未易卜燕薊未服則大梁未易宅唇亡齒寒者此之謂矣由是以論則三京利害各有攸當不可一槩求也然以王道繩之是不無優劣焉從古議者紛紛莫不以長安為優而臣意則否長安之地四塞雖固而包履裁一心之境八州之民皆吾

赤子而乃壅潼嶢以自固是何示天下以私也豈天子守在四夷而王者以天下為家之義哉嗚呼天生民而立之君所以均調而齊一之也故王者之作必中天下而立定四海之民俾其貢賦於是而易輸寃抑於是而易訴朝覲會同於是而易期赴調上計於是而易達故布德行仁則易以均被發號施令則易以敷暢皆所以均惠斯民也若夫洛邑之地當天下之中大梁坐水陸之衝其所以惠利斯民孰便於此傳曰譬如北辰居其所而眾星拱之洛邑之謂也又曰三十輻共一轂大梁之謂也然則欲求一室萬世之都

所以為國家生民無窮之計三都之中印洛其庶幾矣

論大梁可都

臣聞世之議者皆以謂天下之形勢莫如雍其次莫如周至於梁則天下之衝而已非形勢之地也故漢唐定都皆在周雍至五季已來實始都梁本朝縱未能遠規長安蓋亦近卜於洛陽乎而安土重遷眷眷於開封之境非所以為萬世計也臣竊以為不然何則唐漢之都必於周雍本朝之都必於梁而後可也夫長安之地左殺函右隴蜀襟屏終南太華之山縈

帶涇渭洪河之水地方數千里皆膏腴沃野卒有急百萬之衆可具形勢便利下兵於諸侯如建瓴水四塞之國也故其地利守自古號為天府開封地平四出諸道輻輳南與楚境西與韓境北與趙境東與齊境無名山大川之限而汴蔡諸水參貫巾車錯轂蹄踵交道軸輻銜尾千里不絕四通五達之郊也故其地利戰自古號為戰場洛陽左纏右澗表裏山河扼殺甬之隘阻成臯之險直伊闕之固廣袤六百里四面受敵以守則不如雍以戰則不如梁然雍得之可以為重自古號為天下咽喉凡天下之形勢無過此

三者也故彼蜀之成都吳之建業皆霸據一方之具而楚之彭城特盜賊之窟耳易曰天險不可升也地險山川丘陵也王公設險以守其國所謂險者豈必山川丘陵之謂哉在天而不可升在人而不可奪則皆為險矣夫雍為天府梁為戰場周為天下之咽喉而臣以謂漢唐之都必於周雍本朝之都必於梁而後可者漢唐以地為險本朝以兵為險故也漢高祖曰吾以羽檄召天下兵莫有至者武帝曰吾初即位不欲出虎符發兵郡國背道材官有變則以符檄發之京師惟有南北兩軍有期門羽林孤兒以備扈從

唐分天下為十道置兵六百三十四府其在關中者惟二百六十有一府府兵廢始置神策為禁軍亦不過數萬人以此見唐漢之兵皆在外也故非四塞之國則不足以制海內之命此所謂以地為險者也本朝懲五季之弊舉天下之兵宿於京師名挂於籍者號百餘萬而衣食之給一毫已上皆仰縣官又非若府兵之制一寓之於農也非都四通五達之郊則不足以養天下此所謂以兵為險者也夫以兵為險者不可以都周雍猶以地為險者不可以都梁也而昧者乃以梁不如周周不如雍嗚呼亦不達于時變矣

夫大農之家建田阡陌積粟萬斛兼陂池之利并林麓之饒則其居必卜於郊野大賈之室歛散金錢以逐十一之利出納百貨以收倍稱之息則其居必卜於市區何則所操之術殊則所托之地異也今梁據天下之衝歲漕東南六百萬斛以給軍食猶恐不贍矧欲襲漢唐之迹而都周雍之墟何異大賈之術而欲托大農之地也由是言之彼周雍之地者漢唐之險耳本朝何賴焉

論金陵

蘇伯衡

蘇子曰初國家建朝廷郊廟社稷于南京徵邵國爲

陰陽之學者各以其術來議至者數百人館于上賓館館之副使劉迪簡者江右人蓋通地理之術云一日迪簡故問諸陰陽之師曰觀綿之詩書之殷盤周誥孔子之語曾參則古人之爲宮室城郭若治地而葬亦惟以上用龜而已陰陽家者出始不受命于鬼神而至用其精鑿絕識可謂難能也已而其書至于今爲其學者守之篇目繁多安所折衷邪曰諸家之書莫切于錦囊之內外篇內外篇中莫要於乘生氣之一語曰生氣烏乎見曰于山川之岡壠向背離合逆順見之故夫地氣之聚者形必勝形之勝者得必

并八和統 卷之五十七 三十一
吉此地理家法也曰吾於大河江漢之南北境未嘗
盡至北條南條之山川未嘗盡窺故吾於周秦兩漢
魏晉唐宋之餘墟未暇具論姑言金陵秦始皇至埋
金以鎮之諸葛亮以為帝王之宅則其氣之聚也形
之勝也有吉而無凶也不待言而知也而其江山吾
與諸公共睹焉前此國其間者曰東晉曰宋曰齊曰
梁曰陳曰南唐其國之所建雖異地其地之相去初
甚近而其歷年或久或近則大相遠何也曰此非有
得失於生氣然哉曰得者久而失者近信邪何為其
久者亦僅僅百餘年而已邪地理之術行于天下

矣而建國又大事也彼六代之君不擇其人而聽其
相度焉人之見擇於六代之君者不竭其目力技能
以效用焉豈其情乎擇人以相度竭目力技能以效
用而其徵應不可與周之上世十年同日而語吾以
惑焉是有出于形勢也則已使無出于形勢也可
不考其故歟曰昔之冠蓋之聚今之桑麻之場也畚
鍤之相尋塹澗於且莫非復當時之舊也甚矣雖欲
考之得乎曰其地脉自東南遡長江而西數百里乃
止其止也蜿蜒磅礴既翕復張中脊而下降為平行
所謂土中於是乎在西為鷄籠覆舟諸山又西為石

井ノ木系
頭城而鍾山峙其東大江迴抱秦淮玄武湖左右映帶兩淮諸山合脊內向若委玉帛而朝斯固無改當時之舊觀也豈惟無改乎當時固無改于開闢之初也氣之聚而形之勝何難知之有則六代所以修短興亡之故豈有不足考者乎且天氣鍾為吉壤猶氣鍾為鉅賢鉅賢之身既亡清明之氣斯散未有傷其一手一足而是氣之行乎其一身者俱斷喪者也今因一岡一壠之變置而謂一都會舉然豈理也哉曰天運有時而推移風氣亦有時而聚散據有定之形論無窮之變不幾于刻舟而求劍乎是以不敢也曰

氣之自聚自散固非人力之所能為歟曰然曰然則所謂聚之使不散行之使有止者誣邪曰此言乎穴法也四時之運無窮焉及其至也則聚者無不散止者無不往勢之所必至也有聚有散有止有往而地之或吉或凶亦與之俱矣是以雄都大邑名城巨鎮倏焉過之而為坵墟壠畝坵墟壠畝倏焉過之又為名城巨鎮雄都大邑也曰是則宇宙之間山川之形勢不改而其氣無定在其地無常吉也決矣然昔之善為宮宅地形者所留鈐記去之五六百年葬而偶直其處徵應無不協則氣未必無定在地未必無常

吉也曰蓄泄不同焉曰寶公指定林寺前獨龍岡謂
武帝曰若以為陰宅後當永久既而寶公示叔武帝
以錢二十萬購其地奉真身寔焉實天監中也於今
八百餘載世運之消息人事之盛衰亦已屢矣而寶
公之光靈振耀猶一日則地之泄者何如哉地以氣
為脉相地以氣為本陰陽家之于地理未嘗不以籍
其口矣夫地之形有方體故其美惡肥瘠蓋有甚於
形勢今於其可指見而言傳者猶不能按以明前代
修短興亡之故則於其藏乎地中者果何以盡得之
乎時余在坐上遽曰何見之晚也儒者之談今夫人有一畝之

宮欲使人居守猶必慎擇其人之克負荷者斯舉而
授之矧金陵之墟王者之都天造而地設不有聖人
其肯輕畀之乎彼晉宋齊梁陳南唐之君乘時割裂
竊而據之皆非天授既不足當王氣之盛又安能乘
生氣之聚余固知天地閱藏其風氣之完厚於數千
年之久以待今天子之興而作都也觀前此之國於
斯者殫其智力弗克混合而今鴻業告成朔南為一
幅員之廣振古所無則天意豈不昭乎休哉萬年無
疆之業固不待望氣者而知王氣之鬱葱不必陰陽
家而知生氣之克周也於是諸陰陽師群然和余而

迪簡遂不復云其口雖不言其心終不無惑也

新刊唐荆川先生稗編卷之五十七

新刊唐荆川先生稗編卷之五十七

